

# Tâi-oân-jī

## 台灣字

國語

雙月刊 NO. 6  
2023.11

Hòk-khan-hō

復刊號 Tâi-oân-jī



Sia jī  
BuLuhSuh



4 hòe  
Kim-chhiú (OMÀMÀ)



台灣字(白話字)標準化討論  
Babuza Chû



Hoan-á-iū teng  
Lahjih



寄去天堂 ê phoe (2)  
Tân Bêng-jîn



人物報導 傳承台灣文化 ê 柴頭雕刻藝術家——陳正雄

# 蔣發太 孫玉枝 台語文教育基金會

## 歡迎申請 Hoan-gêng sin-chhéng

發枝台語薪傳終身貢獻賞

蔣發太先生台語師培菁英賞

孫玉枝女士台語認證傳承賞

巴克禮牧師台語文國際化貢獻賞

鄭兒玉牧師白話字貢獻賞

王育德教授台語文研究賞

鄭良偉教授台語文研究賞

王育德博士講座

林茂生大師講座

林茂生論文發表賞

陳信從老師玉蘭樹賞

詹文聲教授國際台語文獎學金

林茂生教授台語教學優良賞

發枝台灣語文出版獎助

詳細請參閱發枝台語基金會全國台語文教學、研究與創作獎勵辦法



本會全名「財團法人高雄市蔣發太孫玉枝台語文教育基金會」，簡稱「發枝台語基金會」。本會宗旨是推動釘根台語 ê 「台灣學」教育、促進台語文 ê 標準化、普遍化 kap 國際化以及落實聯合國「世界文化多樣性宣言」、「世界母語日」lai-té 對各語言族群文化保障 ê 精神。

郵政劃撥 |

請註明捐款事項 kap 捐款者：對本會捐款會當抵稅  
戶名／財團法人高雄市蔣發太孫玉枝台語文教育基金會  
帳號／4236 9509

2023年獎學金頒發新聞報導  
發枝台語基金會與永康勝利國小  
合作頒發台語文獎學金



成大台語文獎學金頒獎典禮  
發枝台語基金會董事及國內外  
來賓作伙出席



蔣發太孫玉枝台語文教育基金會網站

Nâ 需要透過銀行帳號捐款，iáh-sī ùi  
國外捐款，請 E-mail hām 阮 chih 接。  
E-mail: hoatki2023@gmail.com

Tâi-gí-si • Siá jī .....	BuLuhSuh 2
• Tū .....	Tân Lō 3
<b>Siá Lán ê Kò-sū • Pêh-ōe-jī sò chêng-ì (2) .....</b>	<b>Siu^n-si nā 4</b>
• 4 hòe .....	Kim-chhiú (OMÀMÀ) 7
• Tâi-oân-jī (Pêh-ōe-jī) phiau-chún-hoa thó-lün (1) .....	Babuza Chû 9
• Tiong-kok-lâng pōe-kut ê DNA .....	Tiun Tì-hong 10
• Phê^n-ô hó chhit-thô .....	Hâu Liâng-têng, Liâu Kiàn-hô, Lâu Gî-him, Chhòa Têng-ú 12
• Tâi-gí gân-gí kah lék-sú bûn-hòa .....	So', Sèng Éng 15
• Sin-thé nā beh ióng tō ài ün-tōng .....	陳俐雯 17
• A-má, góa thè lí moa ûi-kin .....	Sió-ka 19
<b>Lahjih Gû-giân • Hoan-á-iû teng .....</b>	<b>Lahjih 21</b>

HL

**Hàn Lô bûn 漢羅文**

A-jîn Choan-nôa • 寄去天堂 ê phoe (2) .....	陳明仁 22
Hák-seng pêng-iú lâi siá-chok • 上kah意 ê 科目 .....	黃韻文 23
• 我上kah意 ê 動物 .....	紀媛茹 23
<b>寫Lán ê 故事 • 我 ê 家鄉 — Tang 港迎王平安祭典 .....</b>	<b>Chú-kiat 24</b>
• 潤餅kauh .....	朱俊豪 25
• 2 條線 .....	周碧玲 27
• 性命中 ê 貴人 .....	高嘉徽 28
<b>人物報導 • 林詠梅女士記持中 ê 林茂生教授 (1) .....</b>	<b>林貞佑 29</b>
• 傳承台灣文化 ê 柴頭雕刻藝術家 — 陳正雄 .....	Tèn Tì-têng 31

**Hong-bin Kò-sū**

陳正雄，1942年於台南安平出世，是傳承台灣文化 ê 柴頭雕刻藝術家，作品多有台灣人肯食苦、樸實、勤儉 ê 性格，看會伊對所生活 ê 土地充滿感情。封面是陳正雄親情系列 ê 作品，有笑容 ê 老翁仔某一對一對坐做伙，感受溫暖。

總編輯 Tân Bêng-jîn

編輯委員 • Chiu Têng-pang • Chiú^n Úi-bûn • Hô Sìn-hän  
 • Koa Khá-lê • Koeh Jûn-têng • Masao Tân  
 • Tân Kim-hoá • Tê^n Si-chong • Teng Hông-tin  
 • Tiu^n Hák-khiam • Tiu^n, Hók Chû

執行編輯 Tèn Tì-têng

美術編輯 Hôa-jîn Sî-kak Siat-ké  
 文字校對 • Chhòa It-bîn • Î Giòk-ngō • Tiu^n, Hók Chû

發行單位



Tâi-oân Lô-má-jî Hiáp-hôe  
 Taiwanese Romanization Association



台文筆會  
 Tâi-bûn Pi-hök  
 Taiwanese Pen

獎助單位



Tâi-gí Ki-kim-hôe  
 蒋發太孫玉枝台語文教育基金會  
 Taiwanese Foundation

[Https://pen.de-han.org/taiwanese](https://pen.de-han.org/taiwanese)  
 Open access 網路電子版 &  
 文章投稿請掃QR code

**Nâ 有任何問題**

歡迎來 phoe: taijanjitauko@gmail.com  
 Tel: 06-2096384



郵政劃撥捐款

戶名／社團法人台灣羅馬字協會  
 帳號／31645936

※請註明捐款台灣字刊物

# Siá jī

BuLuhSuh

Siá kóa bûn-jī, lâu-lòh hiáng-sî ê sim-chêng

Peh-hun chin-sim, nñg-hun ián

Ū sî gí-sû bô kàu ēng

Siōng chin ê 2 hun siá bē bêng

Siá kóa bûn-jī, chhàng jíp jī ê hái-éng

Thau-thau-á chham kóa ka-tī ê kám-chêng

Bô-tiu<sup>n</sup>-tî

He jī soah tote éng

Poáh-lòh chhim-chhim ê hái-ē

Siá kóa bûn-jī

Kā lí kóng góa chit-má ê piáu-chêng

Bì-luh hâm lm-gák ê kiōng-ián

Hi-hi-hōa-hōa sī kòe-khì ê chêng-kéng

Siá kóa bûn-jī

Kā kin-á-jít kóng chài-hōe

Bái--ê lóng hō--khì

Bîn-á-chài kè-siòk koh piáu-ián



全民台語認證  
Choân-bân Tâi-gí Jîn-chèng

每年春秋季舉辦 \*

檢驗家己 ê  
愛台指數



多一份語言證照 \*

多一份就業及升學加分機會 \*

相關詳情歡迎請參閱官網資訊 Tel:06-2387539 Fax:06-2755190  
<https://ctlt.twl.ncku.edu.tw/gpt> E-mail: tgpomia@gmail.com

主辦  
單位



Tâi-oân Gí-bún Chhek-giâm Tiong-sim  
NCKU Center for Taiwanese Languages Testing



Tâi-oân Lô-má-jī Hiáp-hōe  
Taiwanese Romanization Association  
台灣羅馬字協會



## Tū

Tân Lō | Pún bûn chok-chiá sī pak-pō-lâng

M-nā sī kхиā tī hia

Mā m sī chìm tī hin lāi-tóe

Sī ū 1 ê bōk-ték

Só-tì ka chhāi tiàm hiă

Ū sī sī 1 pō-hūn

Ū sī sī kui-ê choân-choân lóng loeh

Khòan beh tū hō iàn-khì

Àh-sī beh tū kah thàu-sim

Beh ài i sí--khì

Àh-sī beh ài hō i khah hó ê khì-bī

Góa 1 sì-lâng tū chiă

Tū Chiná bûn-hòa ê lah-sap-chúi--níh

Kui sin-khu lóng Chi-lâng sái-jiō-bī

Khui-chhùi tō ài ê kóng-chih

Lín niâ góa Tâi-oân-ōe siáñ lóng bōe-kì--tit

Kóng gún Tâi-gí soa-bûn chû-gī!?

Hiông-hiông tō hong-hóe chóng-tōh

Siūñ beh kā in tū jíp-khì \*hông-chúi-kok

Thé-hóe 1 ê á ngó-kám chiâu tòk

Beh cháu bô lō, beh oåh kan-khó ê chu-bī

\* Tī Tâi-pak Sin-pak-tâu ê 1-ê tē-hō-miâ. Kó-chá bat ū lâng kóng "Hông-chúi-kok" (礦水谷), ū liû-hông-chúi ùi soañ-kok ê thô-kha lâu--chhut-lâi ê ì-sù. Hiân-chhú-sî hō-chò "Tē-jiát-kok" (地熱谷).



TLH 台灣字雜誌——線頂讀冊會

2024年起鼓

Làng禮拜ê拜5 19:30~21:30

連絡電話／0911 143 668 Google表單報名



# Péh-ōe-jī sò· chêng-ì (2)

Siu<sup>n</sup>-si nâ

**Lán** sék-sāi tē jī tang ê nî-thâu, kong-si pàng sa<sup>n</sup> kang ê Goân-tàn kè, lí túi<sup>n</sup>-lâi Gî-lân, khà tiān-ōe hō góa kóng, bîn-á-chài lán lâi-khì kiâ<sup>n</sup>-kiâ<sup>n</sup>--ê! Góa sim-lâi chìn hoa<sup>n</sup>-hí, sûi ìn hó.

**Chū-chiōng** kū-nî 10 goéh-tiong, lí chhut-ī<sup>n</sup> kàu ta<sup>n</sup>, góa lóng bô kap lí liân-lòk. In-ūi lí chhut-ī<sup>n</sup> bô kúi kang, góa bé chit-kóa kóe-chí khì, chē chhia khì lí kap tông-sū sòe ê chhù chhōe--lí. Góa kàu mûi-kha-kháu, ùi thang-á mûi khòa<sup>n</sup>-jip-khì, hit-ūi lí tī Tâi-pak sék-sâi ê lú-pêng-iú, i chē tī bîn-chhâng pi<sup>n</sup> chiàu-kò--lí. Góa chìn siong-sim tō lâi lî-khui. Chē tī kong-chhia ê siōng âu-piah, bâk-sái it-tít lâu, móa-pak ê sim-sui<sup>n</sup> m̄-chai beh kóng hō siáng thia<sup>n</sup>? Hó-ka-chài ū kòa o-jîn ê bâk-kiâ<sup>n</sup>, chiah bô hông hoat-hiān. Tō án-ne lán chhin-chhiū<sup>n</sup> phah tñg sòa<sup>n</sup> ê hong-chhoe, bôe-hù kóng chit-kù chài-hōe. Hái gún ê sim-koâ<sup>n</sup> ná-chhiū<sup>n</sup> tiàu teh pòa<sup>n</sup>-khong-tiong ê chuí-tháng, tī hia tông-tông hâi<sup>n</sup>!

**Keh** túi<sup>n</sup>-kang chái-khí, lí khiâ lín tōa-hia<sup>n</sup> ê o-tó-bái lâi chài--góa,

chē tī âu-piah ê góa, kâ lí lám-ân-ân, bô mûi kóng lán beh khì tó? Chí-iàu kap lí chò-hóe, khì tó lóng hó! Lán lâi kàu Pak-hái-hôa<sup>n</sup> ê Pak-koan, lí kâ góa ê chhiú khan--leh, chhōa góa sūn chiöh-khat-á peh kàu siōng koân ê só-châi. Lán chē tī hia khòa<sup>n</sup> hûi<sup>n</sup> hiû<sup>n</sup> ê Ku-soa<sup>n</sup>-tó, i chhiū<sup>n</sup> tī hia tìn-siú lán ê kò-hiong Ka-ma-lân. Péh-éng kâ iân-hái o--ê ê gâm-chiöh khan kui chôa ê lé-suh, chìn súi--oh! Khui-khoah ê kéng-tì hō lâng sim-hoe-khui. Siōng hâi ê sî lí un-jiû chhim-chêng ê chim, hō góa koh-chài poâh jip-khì chheng-chhun ê bí-bâng. Túi<sup>n</sup>-lâi Lô-tong chiâh àm pá, lán chhiú khan--leh, kiâ<sup>n</sup> jip-khì nâu-jiát ê iâ-chhî-á pi<sup>n</sup> ê kong-hûi<sup>n</sup>, chē tī liâng-têng-á kap chûi-tî-á pi<sup>n</sup> ê chiöh-í, chhin-chhiû<sup>n</sup> chē tī lán hâ-pan khì iok-hōe ê sió kong-hûi<sup>n</sup>-á kâng-khoán.

**Chit-pái** lí chē tī hia bô sâ<sup>n</sup> ài kóng-ōe, góa sim-lâi kám-kak koài-koài? Kòe chit-khùn-á, lí chiah khui-chhùi kóng, i kiò góa ài chhōa i, nâ-bô i beh khì sí. Siá<sup>n</sup>! Che bêng-bêng sî ui-hiáp, lí ná-ē beh chiap-siú?

Góa jit iáh tán mê iáh tán, kui-bóe kèng-jiān sī hō·pát-lâng lâi koat-tēng lán ê bī-lâi. Bák-sái iáu bē-hù lâu, khòa<sup>n</sup>-tióh lí ê bīn ū nīng chōa bák-sái tiām-tiām-á teh lâu, lí sòa lōe kóng, góa ē sí! Thi<sup>n</sup>--ah! Ūi-siá<sup>n</sup>-mih lí ē sí? Góa bô ài lí sí--lah! Chit liáp thâu-khak loān-chhau-chhau, sim-koan<sup>n</sup> jū-chháng-chháng, siong-sim, gēng-sim, chheh-sim, kiat kiat chò kui khiû, góa siū<sup>n</sup> bô chit kù ōe thang hó an-ùi--lí!

**Tē** sa<sup>n</sup> kang, lán chòe-āu ê iok-hōe sī tī Tōa-pi (Mûi-hoe ô), siū<sup>n</sup>-tióh koh-lâi lán tō chhân bô kau, chuí bô lâu, góa bô-sim bô-chiâ<sup>n</sup>, nīng lâng kiâ<sup>n</sup> tī ū chit-kóa iû-kheh ê soa<sup>n</sup>-lō<sup>n</sup>, lí beh khan góa oat kòe-khì lēng góa hit-thâu ê soa<sup>n</sup>-lō<sup>n</sup>, góa bô--ài! Che sī góa tē jī pái kī-choát lí ê iau-kiû, mā-sī siōng bóe chit pái.

**Chiâh** tàu pá, lí chài góa khì Tân-oân-gîn-hâng ê chhia-pâi-á kha tán chhia, góa ñg-bāng kong-chhia khah bān lâi--ê, m̄-koh chhia chìn kín tō lâi--ah! Góa m̄-ká<sup>n</sup> khòa<sup>n</sup> lí hit nīng lúi hō góa cháu bōe khui kha ê bák-chiu, chhia mûi chit ê khui góa tō kín thiàu chiū<sup>n</sup>-chhia. Túi<sup>n</sup> kàu chhù, sim-sū bô lâng thang kóng, chí-hó kā lán nīng lâng ê siòng-phō-á thêh--chhut-lâi, kiâ<sup>n</sup> khì

hù-kīn ê soa<sup>n</sup>-pi<sup>n</sup>, khû tī soa<sup>n</sup>-lō<sup>n</sup>, bák-sái ná lâu ná kā siòng-phì<sup>n</sup> chit-tiu<sup>n</sup> chit-tiu<sup>n</sup> thêh--chhut-lâi, sio-sio--tiāu!

**Āu--lâi** góa kā tōa-hia<sup>n</sup> pun chit tiu<sup>n</sup> lí ê siòng-phì<sup>n</sup>, kiàn-nā khòa<sup>n</sup>-tióh hit tiu<sup>n</sup> siòng, khî<sup>n</sup> bák-sái teh siū<sup>n</sup>, ká-sú lí hit pái ài góa kā lí se<sup>n</sup>-kiá<sup>n</sup>, góa nā ū lí ê gín-á, lí sī-m̄-sī tō ē chhōa--góa? Lí tō bē sí--ah? Ká-sú lí hō<sup>n</sup> i ui-hiáp ê sī, góa ū ióng-khì kā lí ê chhiú khan--leh kóng, Kiâ<sup>n</sup>... lán lâi khì kap i kóng chit-ē-á tō-lí. Lí sī-m̄-sī koh tī chit-ê sè-kan? Góa tī chia siū<sup>n</sup> hiah chē, mā-sī bô-hoat-tō bân-hōe lí ê sè<sup>n</sup>-miā!

**Sui-bóng** chit-má góa sī ka-kī chlt ê lâng, m̄-koh siū<sup>n</sup> khí lí siá hō góa ûi-it chit-tiu<sup>n</sup> phoe, tī leh góa 22 hòe kiat-hun chêng, góa ka sio--tiāu, siū<sup>n</sup> beh ôh gún a-pâ phiau-phiat, m̄-koh hit tiu<sup>n</sup> péh-chhón âng-keh-á só siá ê hit sì-jī, ài lí éng-oán, chá tō khek tī góa ê sim-koan<sup>n</sup>-thâu, sio mā sio bē tiāu.

**To-siā** lí ê ài, hō góa bōe kō-toa<sup>n</sup>. Góa chìn phah-pià<sup>n</sup> teh oâh, bōe 30 hòe tō khai-sí thia<sup>n</sup> Tē-hâ-tiān-tâi, koan-sim siā-hōe sū, 40 góa hòe kiâ<sup>n</sup> ke-thâu, 50 góa hòe ôh Pêh ōe-jī..., kan-nā siū<sup>n</sup>-beh kā lí ê giâh oâh-

-túi<sup>n</sup>-lâi. 2019 nî ê 10 goéh, góa khai-sí tòe Kim-hoa lāu-su óh Péh-ōe-jī, góa chìn jīn-chin teh óh, siū<sup>n</sup>-beh kā góa tui lí ê su-liām kap sim-chêng, iōng góa siōng sèk-sāi, siōng kah-ì ê gí-giân lâi siá, i chiah ū hoat-tō oân-choân lâi piáu-tát góa ê sim-ì. Tán

góa sè<sup>n</sup>-miā ê siōng bóe hit-kang nā kèu, lí ài lâi khan góa ê chhiú--o·h!

2022/05/29

Choân bûn kiat-sok

## @Google Meet

## 線頂台文讀冊會

### 打狗台語文 讀冊會

Ták月日第2、4 ê拜1 20:00~22:00

目前teh讀／陳明仁台語文學選

主辦／Tá-káu Tân-gí-bûn CCHH



請傳訊息來FB

### Làu台語-瑞士ê台語社

時間請看Làu台語-瑞士ê台語社FB

讀冊會／台灣唸歌·陳雷台語文學·陳明仁

台語文學·台語文青·繪本·俗諺

主辦／Làu台語-瑞士ê台語社

會議室贊助／台文雞絲麵 Tân-bûn Kesimī x

Tá-káu Tân-gí-bûn CCHH



請傳訊息來FB

### 八卦寮 讀冊會

Làng禮拜ê拜4 19:00~21:00

目前teh讀／無影無跡

主辦／台灣羅馬字協會 仁武分會



請傳訊息來FB

### Chhōe Tân-gí 讀冊會

Ták禮拜3 20:30~22:30

目前teh讀／A-eng--a

主辦／台文雞絲麵 Tân-bûn Kesimī

協辦／Tá-káu Tân-gí-bûn CCHH



請thin 表單

### Khin-sang Thák-chheh-hōe

Ták禮拜6 20:00~23:30

目前teh讀／鄉史補記

主辦／Khin-sang Thák-chheh-hōe

協辦／Tá-káu Tân-gí-bûn CCHH



請傳訊息來Twitter

### 車幫放送局 讀冊會

Làng禮拜ê拜2 21:30~23:00

目前teh讀／台文通訊30冬紀念特刊

主辦／島嶼ê台語車幫



請傳訊息來Twitter

# 4 hòe

## Kim-chhiú (OMÀMÀ)

### 4 hòe 3 kò goéh

Kah tōa-hàn--ê khùn tī āu-thâu thâu-chêng ê pâng-keng. Thàu-chá 7 tiám gōa, i khin-khin-á mñg góa, "A-bú góa kám ē-sái khí--lâi ah?" "Hó ah, lí khì lâu-kha chhōe a-kong hó--bô?" Góa iáu chin ài khùn. I thia<sup>n</sup> tiòh sûi thiàu lòh bîn-chhñg. Góa péng 1 ē sin, siū<sup>n</sup>-beh kè-siòk khùn. Bô gōa kú, i koh ùi àm-bong-bong ê châu-lông chông--jip-lâi, mñ koh mā bô bē-kì koai<sup>n</sup>-mñg, koai<sup>n</sup> liáu sûi koh thiàu--khí-lâi góa pi<sup>n</sup>-á kā bîn châh--leh.

"Án-nóa--ah?"

"A-kong bô tī lâu-kha..." I thia<sup>n</sup>--khí-lâi sió-khóa-á nâ-âu-kñg teh tî<sup>n</sup>.

Góa chai-iá<sup>n</sup> i chin bô tá<sup>n</sup>, chin kia<sup>n</sup> àm, i í-keng chò liáu chin hó--ah, oát-thâu ka lám--leh.

Khùn-sîn í-keng châu--khì, góa soah mā bô siū-khì.

### 4 hòe 4 kò goéh

Ká-ná chiáh phái<sup>n</sup> pak-tó: Thia<sup>n</sup> i sia<sup>n</sup> èng-kai khùn--khì ah, kín thau chông khì pàng-sái.

Siū<sup>n</sup> bē kàu bô gōa kú i tō ùi pâng-keng khàu chiok tōa sia<sup>n</sup> kiò góa kín tñg--lâi.

Kā mñg,

"Lí ná chai-iá<sup>n</sup> góa bô--khì? Lí mñ sî khùn--khì ah?"

"In-üi góa bák-chiu kheh-kheh ê sî-chûn, khòa<sup>n</sup> tiòh ū kng châu--jip-lâi, koh koai<sup>n</sup>--khí-lâi. Góa tō siū<sup>n</sup> kóng, ē, kám sî goán bú-á chhut--lih ah? Bong pi<sup>n</sup>--á, lí bô--khì, góa koh kóng "Má-mah?" Lí mā bô ìn, góa tō khàu ah!"

(!!!!) (Lí chiah 4 hòe tō ē-hiáu kóng-kó hõ góa thia<sup>n</sup> ah, sî án-nóa khùn chìn-chêng lóng teh ké-siáu kóng lí bē-hiáu kóng!! Siá<sup>n</sup>-mih kng châu--jip-lâi koh koai<sup>n</sup>--khí-lâi, áu kái lóng lí kóng kò-sû hõ góa thia<sup>n</sup> örü!!)

### 4 hòe 5 kò goéh

A-má chû moâi kià lâi hõ lülí in sió-moâi.

"Góa siū<sup>n</sup> beh khà tiän-ōe khì koán-lí-sek mñg khòa<sup>n</sup>-mâi moâi lâi ah bôe, á-sî lí siū<sup>n</sup>-beh khà?"

“Hó, góa beh khà. (Tùi-káng-ki giáh-khí-lâi.) Góa sī bó-mí hō bó-mí lâu, chhiáⁿ-mñg kám ū goán ê kòa-hō?”  
Koán-lí oân: (BMBMBM...)

“Pháiⁿ-sè chhiáⁿ-mñg lí kám ē-sái kóng Tâi-gí?”

Koán-lí oân: (Chhiat Tâi-gí)  
(BMBM...)

“Èn... He sī 1 ê sè-hàn baby ê moâi, chhiáⁿ-mñg kám lâi--ah?” ...Ōh lí ài chhōe khòaⁿ-māi, hó.

Góa tiàm piⁿ--á thiaⁿ liáu sió-khóa ài chhiò, m̄ chai sī án-nóá ài kâng kau-tài hiah chōe?

Iūlí oát-thâu kā góa kóng, “Èn i kóng ū!”

Tùi 1 ê 4 hòe ê gín-á lâi kóng, tùi-ōe oân-sêng-tō ū koân! Jî-chhiáⁿ kèng-jîan sêng-kong hō 1 ê gôa-séng--ê kah i kóng Tâioânōe.

Proud of u!!



講者：Hé-bí  
台文雞絲麵發起人

台文雞絲麵  
**ke si mi**

PhahTaigi  
台語輸入法 + ChhoeTaigi  
台語辭典

台文雞絲麵  
利便台語文學習好ke-si !

奇月基礎場 /  
完全免基礎，來體驗PhahTaigi台語輸入法。

雙月進階場 /  
Ài有台語羅馬字基礎，來學習PhahTaigi台語輸入法、ChhoeTaigi台語辭典ê使用技巧kap撇步。

活動細節請關注  
「台文博覽會」官方FB口座  
<https://www.facebook.com/taibunexpo>

TAI-BUN EXPO  
Tâi-gi-bun

# Tâi-oân-jī (Péh-ōe-jī) phiau-chún-hoa thó-lūn (1)

Babuza Chû

**Gí-giân** ê pún-chit sī sia<sup>n</sup>-im. Sia<sup>n</sup>-im piáu-sī ì-sù chiū-sī gí-giân. Lâng ū gí-giân, tōng-bút mā ū! M̄-kú kanta lâng ū chhòng-chō bûn-jī lâi kì-liòk kap pó-chûn gí-giân. Bûn-jī siāng-sī mā thê-seng gí-giân ê bûn-hòa thêng-tō, hō gí-bûn ū bí-kám, thang chiâ<sup>n</sup>-chò bûn-hák chok-phín. Só-pái kóng bûn-jī sī gí-giân chiok iàu-kín ê kang-kū.

**TOL (Tâi-oân-lâng)** tùi bó-gí ê lí-kái lóng khò “sia<sup>n</sup>-im”, m̄-sī bûn-jī. Só-pái bûn-jī, tèk-piat sī abc chit-khoán bûn-jī, beh án-chóa<sup>n</sup> kā “sia<sup>n</sup>-im” piáu-sī hō chheng-chhó, bô cháu-cheng, bē gō-hoe, thang-kóng sī tē-it iàu-kín ê tāi-chì. Hàn-jī góa bô beh thó-lūn.

**Tōa** pō-hūn ê TOL sī bó-gí chhe<sup>n</sup>-mê-gû, sui-bóng ē-hiáu kóng mā ē-hiáu thia<sup>n</sup>, khiok bē-hiáu thák mā bē-hiáu siá ka-kī ê bó-gí, put-koán in ê bó-gí sī Kheh-gí, Goân-bîn-gí á-sī Tâi-gí. Che-sī in-ūi Tâi-oân kú-tâng hō góa-lâi chèng-koân sit-bîn thóng-tī. Thóng-tī-chiá it-tít

siū<sup>n</sup>-khang siū<sup>n</sup>-phâng beh siau-biát TOL ê sin-hūn, hú-tiāu Tâi-oân Bîn-chòk ê ì-sek, kì-tî kap bûn-hòa. Hō lán chiâ<sup>n</sup>-chò sit-bîn-chiá ê sūn-bîn. Só-í kìm-chí tī hák-hāu kà Tâi-oân lèk-sú kap sú-iōng bó-gí. TOL hō chit-khoán gû-bîn chèng-chhek éng-hióng ê kiat-kó sī m̄-chai ka-kī ê lèk-sú, mā khòa<sup>n</sup>-bē-khí ka-kī ê bó-gí bûn-hòa!

**Ta<sup>n</sup>**, 21 sè-kí, Tâi-oân-lâng ê chèng-tī ì-sek í-keng kak-chhé<sup>n</sup>, bûn-hòa chû-thé-sèng mā tàuh-tàuh teh puh-í<sup>n</sup>, khai-sí sió-khóa chai thang ài òh Tâi-oân lèk-sú kap pó-sioh ka-kī ê gí-giân bûn-hòa. **TOJ (Tâi-oân-jī)** cháp-chì chit-má koh hòk-khan chhut-pán chiū-sī tāi-piáu chit-khoán ê sī-tāi cheng-sîn (Zeigeist). Che-sī chin-chià<sup>n</sup> kiàn-kok ê lèk-sú khám-châm. Chit-chûn lán eng-kai khai-sí lâi thó-lūn Tâi-oân-jī (Péh-ōe-jī) bûn-jī ê piau-chún-hòa.

# Tiong-kok-lâng pōe-kut ê DNA

Tiuⁿ, Tì Hong

**Lán** lóng chai-iáⁿ DNA ê-tàng kàm-tēng pē-kiáⁿ, bú-kiáⁿ ê koan-hē, m̄-koh ū chit chióng lâng ê DNA m̄-nā ē ūi-thoân, koh chhin-chhiūⁿ pēⁿ-tók kâng-khoán, ê òe--lâng, he tō-sī Tiong-kok-lâng pōe-kut ê DNA.

**Chin-chē** lâng bat khòaⁿ kòe Tiong-kok ê hì-kiòk “lûⁿ-ka-chiòng”, tī Kim-sa-than tāi-chiàn chìn-chêng, Sia-thài-kun ū pok-kòa, kòa-chhiāng chhit-hiān “chhit chú pó chú liòk chú sēng”, bô-lûn sī liòk chú sēng-kong, áh-sī liòk chú sēng-jîn, lóng-sī a-bú sim-lâi ê thiàⁿ. Kiat-kó sī chí chhun làk-lông lûⁿ lân-chiau tñg-lâi. Sòa--lòk-khì tō-sī “sù-lông thàm bú”, hō chiâⁿ chē lâng khòaⁿ kah bák-sái lâu, bák-sái tih. Che it-chhè lóng-sī kan-sîn Phoaⁿ Jîn-bí kau-kiat Khè-tan só chō-sêng--ê, chhiūⁿ chit-khoán thong-ték poān-kok ê kan-sîn, tī Tiong-kok ê lèk-sú siōng chin-chiàⁿ sī chòk hoân put-kip pī chài.

**Chit-khoán** pōe-kut ê DNA tī Jī-chhù tāi-chiàn liáu-hâu, tote Kô-bîn-tháng tāi-liōng “chìn-kháu” lâi-kàu Tân-oân. In-ūi hit-tang-chūn ū “Khan-loân Sî-kî Kiam-siok Húi-tiáp Tiâu-lé” chit-bî ê

ī-hông-siā tī--leh, chit-khoán pēⁿ-tók châm-sî siū-tiòh khòng-chè, bô-hoat-tō khì òe--lâng. M̄-koh tī kái-tû kài-giâm í-āu, chit-khoán pēⁿ-tók chioh giân-lûn chū-iû sì-kè thòaⁿ, sì-kè khì òe--lâng, ták-chióng chòk-kûn ê lâng lóng-ū lâng hō òe--tiòh, àn khah-chá kà lán ài hoán-kong tāi-liòk, siau-biât bân-ok ê Kiōng-húi, piàn-sêng ài hō lâng thóng-it. In ê kì-tî chin bái, chit-khoán thong-ték poān-kok ê hêng-ûi, tī kó-chá sī thi kiú chòk ê tāi-chôe, ê hō lâng lâng liâh chhù thiah, ke-á ah-á liâh kah bô pòaⁿ chiah. Hō chit-khoán pēⁿ-tók òe--tiòh ê lâng-sò kâng-khoán sī chòk hoân put-kip pī chài.

**Tī** Bú-hàn Hì-iām thòaⁿ kah choân sè-kài ê sî, lán Tân-oân-lâng kiōng-tông phah-piàⁿ, chun-siú kui-kí, kok-chè siā-höe lóng teh o-ló. Kok-chè siā-höe sàng lán ī-hông-siā, kám-un tō bē-hù à, tài-tiòh Tiong-kok-lâng pōe-kut ê DNA ê lâng iōng ok-tók ê ôe teh phì-siùⁿ, kóng Tân-oân sī “ī-hông-siā ê khit-chiâh”.

**Chèng-hú** chū chá tō kè-ōe beh bé ī-hông-siā, m̄-koh kòe-têng chiâⁿ

hók-cháp, m̄-sī chhiūⁿ khì chhài-chhī-á bé-chhài hiah kán-tan, koh ū Tiong-kok teh chó-gāi, hit-tīn tài-tiōh Tiong-kok-lâng pōe-kut ê DNA ê lâng m̄-sī m̄-chai, sī ài tiau-kang tī Tâi-oân loān, chiah ē-tàng kā in ê chó-kok Tiong-kok kau-tài.

**Tài-tiōh** Tiong-kok-lâng pōe-kut ê DNA ê lâng tī kok-sán ī-hông-siā ê gián-kiù kai-tōaⁿ tō it-tit teh phì-siùⁿ, sì-kè chō iâu-giân, kán-ná bô hi-bâng Tâi-oân kok-sán ê ī-hông-siā ê-tàng gián-kiù sêng-kong, thián-khui sè-kài tē-tô, ū tó 1 ê kok-ka ê chāi-iá chèng-tóng bô hi-bâng ka-tī kok-ka ê kok-sán ī-hông-siā ê-tàng gián-kiù sêng-kong? Tap-àn chiâⁿ kán-tan, tō-sī tài-tiōh Tiong-kok-lâng pōe-kut ê DNA ê chèng-tóng kap tài-tiōh chit-khoán pēⁿ-tòk ê lâng. Choân Tâi-oân lóng teh hông-tī Bú-hàn hì-iām ê kî-kan, in

chò-kè siáⁿ, kan-tāⁿ seⁿ ke-nñg bô, pàng ke-sái kui tōa tuí niâ.

**Óh** Oát-lâm-ōe liáu-āu, ū ki-hōe sék-sāi Oát-lâm-lâng, sui-bóng pak-pō ê lâng kap lâm-pō ê lâng bē-hâh, m̄-koh tng kok-ka ū tāi-chì ê sî, bô hun lâm-pak, ták-ê thoân-kiat tùi-gōa, hō lâng chiâⁿ him-siān, khó-lêng sī Oát-lâm-lâng ê té-khòng-lék khah kiōng, bô hō Tiong-kok-lâng pōe-kut ê DNA òe-tiōh.

**Beh** án-chóáⁿ tùi-khòng Tiong-kok-lâng pōe-kut ê DNA chit-khoán pēⁿ-tòk, kò-jîn jîn-ûi siōng ū-hāu ê ī-hông-siā tō-sī “Tâi-oân-hák”, kā Tâi-oân ê it-chhè hó-hó-á óh hō thong, pau-khoat bó-gí, tē-lí, lék-sú, jîn-bûn, siā-hōe, bûn-hòa téng téng, thák hō bat tō ê sán-seng “Tâi-oân kok-ka ì-sek” ê khòng-thé, lâi tùi-khòng Tiong-kok-lâng pōe-kut ê DNA chit-khoán pēⁿ-tòk.



12/16 拜六  
14:00~16:00

講者／  
林裕凱

寫台語文 ê 總合討論



2023台語文學系列講座

Suí--ah ! 好--ah !

咱台文！

繁來報名



歡迎有台語羅馬字基礎 ê 朋友來了解

12/18 拜一 講者／  
20:00~22:30 Ngô Hê-bí

台文 ke-si 進階使用  
撇步大公開！



台文  
雞絲麵

繁來  
報名

Thák Chheh

# Phê<sup>n</sup>-ô hó chhit-thô

Hâu Liāng-tēng, Liāu Kiàn-hô, Lâu Gî-him, Chhòa Tēng-ú

## 1. Lú-tô kî-thâi kah ñg-bâng

Gún sī lâi-chū Sêng-tâi Tân-bûn-hê ê hák-seng, chit nñg-sa<sup>n</sup> tang lâi tî Tân-bûn hê thák-chheh hùn-liân ê kòe-têng tang-tiong, mñ-nâ òh tiôh bûn-hák, lék-sú hâm gí-giân-hák ê tì-sek, mā ū piáu-ián gê-sút kap tê-hng bûn-hòa ê súi. Chit-má gún hi-bâng kâ chia ê tì-sek chah chhut-lâi kàu-sek hō i kiâ<sup>n</sup>-jip thó-tê. Tî chit cháp kang ê kòe-têng gún ê thàu-kòe hóng-mñg thé-giâm lâi liáu-kái Phê<sup>n</sup>-ô châi-tê ê lék-sú bûn-hòa, khì cháu-chhöe châi-tê û-bîn kang ê kò-sû, thoân-thóng im-gák ê thoân-sêng, biô-ú bûn-hóa kap châi-tê lék-sú.

## 2. Lâi chû chháu-tê ê sia<sup>n</sup>-im

Iáp Sêng-jîn, siàu-liân sî leh chò hî-kang liâh hî. Û chit-pái tî Ko-hiông chiû<sup>n</sup>-hôa<sup>n</sup> khí--lâi liáu-âu, ì-gôa thia<sup>n</sup>-tiôh lû<sup>n</sup> Siù-kheng lâu-su tôa<sup>n</sup> chhia-kó-tiâu, i hō chit-chióng soân-lút bê-tiâu--leh, liáu-âu khai-sí chhim-jip gián-kiù thoân-thóng Hán-gák. Iáp Sêng-jîn lâu-su siông chhut-miâ--ê tiôh-sî thó-hái-ko, lœ-iông sî leh kóng thó-hái ê kan-khôr.

“Tê it kan-khó liâh tôa-kún, tê jî kan-khó phâng hui-lûn, tê sa<sup>n</sup> kan-khó chhia bê-sûn, tê sì kan-khó leh hîn-chûn, Tê gô kan-khó kâng chû-pñg, chû kah sa<sup>n</sup>-tiá<sup>n</sup>...”

Phê<sup>n</sup>-ô ê Tân-gí Youtuber—Hái-kha gín-á “Hái-kha gín-á” thâu-khí-seng sî in-üi hèng-chhù mā sî in-üi sék-sâi i ê gí-giân hâm i ê ka-hiong. I ê pún-giáp sî tî kok-tiong kà sò-hák, mñ-koh tî kàu-hák ê kòe-têng, i mā hi-bâng ê-sái thàu-kòe chit-kóa chhù-bî ê hong-sek kah hák-seng kah óa-leh.

Sui-jiân pún-té sñg-sî leh chò hó-sñg niâ-niâ, mñ-koh lú chò lú û ì-sù, tùi Hái-kha gín-á lâi-kóng, Tân-gí sî i tî chhù lâi-tê leh sú-iông ê gí-giân, mā sî hâm sî-tôa-lâng pôa<sup>n</sup>-nóa kám-chêng ê liân-kiat, só-í Tân-gí tùi i lâi-kóng it-tít sî chit ê chiâ<sup>n</sup> chhin-chhiat, un-loán ê pôe-phôa<sup>n</sup>. M-koh Hái-kha mā kóng, tôa-hàn liáu-âu, i hoat-hiân sin-khu-pi<sup>n</sup> ê-hiáu Tân-gí ê lâng lú lâi lú chió, kî-sít tî Phê<sup>n</sup>-ô leh sú-iông Tân-gí ê chōng-hóng mā bô kài lòk-koan, hák-seng gín-á kóng Tân-gí, thia<sup>n</sup> Tân-

gí ê lêng-lék lóng tāuh-tāuh-á leh liû-sit, tō sng-sī hák-hāu lāi-té pún-thó gí-giân ê khò-têng, i mā kám-kak khah chhin-chhiūn sī héng-sek siōng ê chìn-pō. Nā-sī bô hō gín-á chit ê sú-iōng Tâi-gí ê khoân-kéng, tō bô-hoat-tō chin-chiàⁿ pôe-ióng chhut gín-á ê gí-giân lêng-lék. Koh ū, i mā hoat-hiān gín-á ē ū chít chióng “kóng Tâi-gí chiok sông” ê siūn-hoat, che mā sī i beh kái-siān ê hong-hiòng. I ê chhōa hák-seng gín-á chò-hóe phah-phì, mā ē tī kà-chheh ê kòe-têng iōng Tâi-gí hâm hák-seng khai-káng, hi-bāng ē-sái hō in ū chít ê ē-sái kóng Tâi-gí ê phōaⁿ.



### 3. Bí-lē hái-iûn-tó

Hái-iûn tùi phēn-ô lâi kóng, ē-tàng kóng sī siōng-tāng siōng iàu-kín ê sim-thâu-bah. I pó-chûn phēn-ô tin-kùi ê bûn-hòa chu-sán, chhui-sak keng-chè ê hoat-tián, mā pau-ióng bô kāng-khoán ê chòk-kûn.

Tī chit(piàn) hioh-joáh gún lâi-kàu Phên-ô, châu-chhōe Tâi-oân bûn-hòa ê kha-jiah, m̄-nā thiaⁿ-tiòh ték-piat ê Phên-ô khiuⁿ Tâi-gí, mā tī lú-hêng ê kòe-têng tiong thàu-kòe hóng-tâm, khì liáu-kái hái-iûn kàu-iòk ê seⁿ-thòaⁿ, thoân-thóng gē-sút ê tì-hüi, châi-tē chhòng-seng ê sít-chiàn.

Lín kám chai-iáⁿ tī chit-chhōa lú-tô tiong gún m̄-nā thiaⁿ-tiòh chít ê lâng kā gún kóng in-üi siàu-liân lâng ê liû-sit, tì-sú chin-ché i-kang khai-sí chò-hóe chham-ú kng bú-kiō ê bûn-hòa. Che hō kióng-biō tī choân-kiû-hòa ê sî-tâi, mā tián-hiān chhut to-iûn ê sek-chhái.

### 4. Siáⁿ-mih sī Tâi-oân bûn-hòa?

Tī Phên-ô eng-kai sī chheng-phang ê hong-jû-tê phòe khiuⁿ-teh-teh ê o-thñg-kóe, khòaⁿ hái-bîn téng thâu kng-sih-sih ê kûn-tó hong-chhái hâm kó-chhù chû-lóh ê súi.


Cháp-kang kòe--khì, gún hoat-hiān ū chít-tin lâng, in tan-sûn phoh-sit, khîn-khiām téng-chin. Ták-kang kan-nā ūi tiòh chít-jít saⁿ-tìng kut-lát phah-piàⁿ, ū hî tō liáh, ū chhài tō chiáh, sioh bút mā ài bút. Khòaⁿ--khí-lâi kó-ì kó-ì, m̄-koh chiâⁿ-chòe bûn-hòa ê pún-chit, in tiòh-sī án-ne

tiām-chut-chut, khai-thok Phê<sup>n</sup>-ô  
bûn-hòa siōng chàt-pak, siōng kin-jūn ê sè<sup>n</sup>-miā-lát.

In sī Phê<sup>n</sup>-ô lâng. In ê seng-oåh kì-tî,  
sè<sup>n</sup>-miā keng-giâm, ū-iá<sup>n</sup> tiöh-sî Tâi-oân  
bûn-hòa bē-tàng hông boah  
tiâu ê hûn, hông khòa<sup>n</sup> khin ê lát.



請先網路登記報名表單  
歡迎出席



2023  
12/23  
10:00~12:00

# 《中台字辭典》新冊發表會

成大台文系  
88154教室

預告

台語傳承終身貢獻賞  
& 受賞典禮



Tâi-gí Ki-kim-hôe  
蔣發太孫玉枝台語文教育基金會  
Taiwanese Foundation



Tâi-oân Lô-má-jî Hiáp-hôe  
Taiwanese Romanization Association  
台灣羅馬字協會



台文筆會  
Tâi-bûn Pit-hôe  
Taiwanese Pen



Tâi-oân Gí-bûn Chhek-giâm Tiong-sim  
國立成功大學 台灣語文測驗中心  
NCKU Center for Taiwanese Languages Testing



Sêng-tâi Tâi-gí Su-chu-pan  
成大台文系台語師資班  
DEPT OF TAIWANESE LITERATURE, NCKU

合辦單位

# Thák Tâi-gí gān-gí kah lèk-sú bûn-hòa ê sim-tek

## So; Sèng Éng

“Jī sī sūi-sin pó, chit-jī tát chhian-kim”. Siók-gí sī kó-chá-lâng thoân-löh-lâi ê tì-hūi, iōng té-té ê chit kù ōe, tō ē-tàng kā kui ê kò-sú beh piáu-tát ê lōe-iōng í-kip beh kā lán kà-sī ê tō-lí pâi-liát tī bīn-thâu-chêng.

**Chit-pún** “Tâi-oân siók-gí káng-chō” ê pó-tián, chóng-kiōng ū siāu-kài 18 kù siók-gí. Tâi-khí-seng ké-soeh siók-gí ê ì-sù, chiap-sòa sī siók-gí iû-lâi, bóe-chhiú lâi pí-lûn hiân-sít siā-hōe ê chêng-hêng.

**Thák** chit pún pó-tián ê sî-chûn, tī bûn-pún lâi-té ū chhut-hiân chit kóa Hân-jī ê thòk-im bô kài chheng-chhó. In-ūi ū ê jī sī kúi nā chióng thòk-im. Múi chit chióng thòk-im tâi-piáu ê ì-sù bô kâng. Lán tō ài tûi-chiàu chèng-khak thòk-im kah èng-iōng, hiah ū chin siông-sè ê soat-bêng, áu-pái khòaⁿ tō chai-iáⁿ án-chóaⁿ thák, tûi oát-thòk chiâⁿ ū pang-chân. Hân-jī ê sú-iōng, “sam-sek-lâng kóng ngó sek ōe”, ū khó-lêng ê oan-ke-niû-chè. Lâu-su ū kóng tiôh chit ê koan-liâm, eng-kai àn í-chá ê lâng iok-sok ê ûi chû. Chit ê

kóng-hoat góa mā kám-kak ū lí-lô, nā sī lóng chiàu ka-tî ê siúⁿ-hoat, ū-iáⁿ ê thák kah choik ngē-táu.

**Lâu-su** ê iōng-ì m̄ kan-na ñg-bâng lán khòaⁿ ū lōe-iōng nā-tiān, koh ài ê-hiáu thák, chiaⁿ-sít nā chhin-sin thák-chhut-lâi, chiah chai-iáⁿ tó-ūi ū kхиàm-tiám. Góa kā pún-sin tú--tiôh ê keng-giām hun chò saⁿ lüi:

1. Ū ê jī sī chin-chiàⁿ bē hiáng liâm.
2. Ū ê jī sī liâm ê chhut--lâi, put-jī-kò bô khak-têng.
3. Ū ê jī ka-tî kám-kak bô bûn-tê, lûn-chin sī saⁿ kóng sì m̄ tiôh.

**Chia** ê chōng-hóng lóng ài kā kì-liòk, chiah bē hō kâng chit liáp chiöh-thâu poäh-tó nñg kái, iû-kî sī tē 3 chióng ài ték-piat chû-ì.

**Chiáp** kóng chhùi ê sūn, chiáp chò chhiú bē tûn. Sui-bóng chìn-chêng bô siông kòe lâu-su ê khò, m̄-koh thiaⁿ tiôh lâu-su o-ló ták ê ū chìn-pô, mā sī put-chí-á lòk-thiòng ê chit chân tâi-chì. Bî-lâi beh chiâⁿ-chò tionsg-hák ê Tâi-gí lâu-su, tûi jī ê jîn-bat kah thák bûn-chiuⁿ ê liú-liâh tō sī ki-pún ê tiâu-

kiāŋ. Chin to-siā lāu-su chit pō chit pō  
tàu khan-sēng, chhōa goán ùi thâu  
kàu bóe ké-soeh bûn-pún khah oh lí-

kái ê só-chāi, chim-chiok thiaŋ goán  
múi chit ê lâng ê liām-thák, mā put-sî  
thê-chhéŋ chhò-ngō it-tēng ài kái.

# 2023秋季 台語羅馬字入門班 初階2

課程內容：練習書寫技巧、有效學習並靈活運用白話字。  
(須具備基本台語聽、說、讀、寫能力)

上課日期：2023/12/02～2024/01/20  
晚上6：30-8：30 (共計18小時)

師資團隊：陳金花、蔣為文、蔣日盈等知名師資。

招生對象：想學台語羅馬字讀寫入門的社會大眾及學生。

研習證書：出席率達80%者，研習結束後可獲得研習證書。

報名日期：即日起至2023年11月30日止，滿10人開班。

額滿就停止報名。

報名方式：請填Google報名表 <https://forms.gle/RY4xseyZw45BCTKK6>

若有何疑問，請聯繫台羅會

email: tlhemail@gmail.com, Tel:06-2089803

報名費用：每人新台幣3200元(教材費另計)。

優惠方案：二擇一：1) 主辦及合辦單位的會員可享8折，即2500元。

2) 三人同行報名享優待，每人2500元，須三人同時劃撥。

退費辦法：開課一天前可退五成學費；開課日起恕不退費。

本課程若因成班人數不足取消開班，可全額退費(須扣除匯款手續費)。

繳費方式：劃撥帳號31645936 戶名：社團法人台灣羅馬字協會

初階2報名 ➤ ➤ ➤  
QR Code



# Sin-thé nā beh ióng tō ài ūn-tōng

陳俐雯

**Kin-kì** Kok-ka Hoat-tián Úi-ôan-hōe thóng-kè, Tân-oân àn 2020 nî sio-liân-sòa 2 tang, chhut-sì ê lâng-giàh pí sí-bông ê lâng-sò koh-khah chíó, chit-khoán “Seng-put-jû-sí” ê jîn-kháu kiat-kò hō Tân-oân jîn-kháu piàn lāu ê sok-tō pâi sè-kài thâu-miâ. Ko-lêng chòk-kûn ī-kè 2025 nî ê chhèng kàu 20%, piàn-sêng “Chhiau-ko-lêng siā-hōe”, iā chiū-sī kóng Tân-oân m̄-nā lāu-lâng ná lâi ná chē, jî-chhiá<sup>n</sup> piàn lāu ê sî-kan mā lú lâi lú kú.

**Ko-lêng-hòa** siā-hōe só ín-khí ê būn-tê tû-liáu éng-hióng kò-jîn, ka-têng, mā tûi kui-ê siā-hōe kap kok-ka chō-sêng choân-bîn-sêng ê chhiong-kek. Lâng nā piàn lāu thâu-chân ài bîn-tùi--ê sī lí chông ê chîn kám ū kàu-giàh èng-hù thè-hiu liáu-āu ê bí-pún , che pau-hâm i-liáu hùi-iōng ê cheng-ka. Nā sī sin-thé koh-iū<sup>n</sup> iâh-sī ki-lêng thè-hòa, sit-lêng ê tñg-kî chiàu-kò khai-siau ê lú kia<sup>n</sup>-lâng. Kin-kì Ōe-hok-pō thóng-kè lán Tân-oân-lâng “Bô kiân-khong miā-bóe”, 2019 nî chêng-ka kàu 8.47 nî, bô kiân-khong miā-bóe sī chí sit-

lêng, tó-chhîng kap bân-sèng-pē<sup>n</sup>. 2020 nî in-ūi ék-chêng ê koan-hê, tì-sú sî-kiâ<sup>n</sup>-chèng kiám-chiô chin chē, só-pái “Bô kiân-khong miā-bóe” ê sòr-jî chit-khùn-thâu-á kiám beh 5 kò-góeh, àn 2019 nî ê 8.47 nî kèng kàu 8.04 nî, che chhòng-hâ 10 tang lâi siōng-tôa ê kèng-hok.

Iā chiū-sī kóng tî Tân-oân m̄-koán cha-pō ā-sī cha-bó “Bô kiân-khong miā-bóe” siōng-bô lóng ū 8 tang gôa, tû chit tōa<sup>n</sup> kî-kan khó-lêng ê pē<sup>n</sup>-bē-khí-chhîng, tài-tiôh sit-tì-chèng iâh-sī in-ūi bô chit-chióng goân-in lâi sit-lêng, chit-sî m̄-nā ka-kî siū pē<sup>n</sup>-thià<sup>n</sup> thoa-bôa oâh kah bô chun-gjâm, liân-tài mā khan-lûi tiôh chhù-lâi ê lâng. Só-pái chiâh-lâu nā bô siū<sup>n</sup>-beh kòe m̄-chiâ<sup>n</sup>-lâng-iū<sup>n</sup> bô-ta-ôa ê jit-chí, ū hòe ê lâu-lâng pêng-sî-á tō ài tûi “Kiân-khong khòa<sup>n</sup>-kò” koh-khah hê-sim-sîn, chiah ū-hoat-tō “lân-tñg kiân-khong miā-bóe” kap “lân-oân sit-tì sit-lêng hoat-seng hâm ok-hòa ê sî-kan”. Kok lâi gôa ū chê-chê gián-kiù lóng chèng-sit kui-lút ūn-tōng tûi sin-thé kiân-khong ū

hó--chhù, chhin-chhiūⁿ ē-tàng thê-seng tōa-náu kong-lêng, ī-hông sit-tì-chèng, cheng-kiōng thé-lát ī-chhī seng-lí ki-lêng chōng-thài, ì-hông bān-sèng-pēⁿ, kiám-khin sin-thé bān-sèng-thiàⁿ ê kan-khó, pang-chān kiōng-hòa kut-thâu hām kin-bah, kiám-chio poáh-tó kut-chih ê hong-hiám... téng. Ūn-tōng tû-liáu ē-sái thê-koân sin-thé té-khòng-lát cheng-ka siū-miā í-gōa, i-hák gián-kiù mā hoat-hiān ū ūn-tōng koàn-sì ê lâng siūⁿ-hoat ê khah chiàⁿ-bīn, sim-chêng pí bô teh ūn-tōng ê lâng ke chiok hoaⁿ-hí-sim, che sī in-ūi lán-lâng teh ūn-tōng ê sî-chūn tōa-náu ê sek-hòng hō-lâng khoài-lòk ê hun-pì-bút, kái-siān sim-chêng hō-lâng khah bē iu-ut.

Lán lâng lóng sī chit-chhut-sì tō khai-sí kiâⁿ-hiòng lāu--khì, kah-sī nā chai-iáⁿ ūn-tōng tûi sin-thé ū hi-ah-nī-á chē hó--chhù, tō ài kā ūn-tōng tòng-chò sī seng-oáh ê chit-pō-hūn, in-ūi kiān-khong sī su-iàu kōaⁿ-chúi ak-koàn--ê, iû-kî tī i-liâu it-tít chìn-pō hō piàn lāu ê sî-kan lú-lâi lú-kú ê sî-tāi. Beh án-chóaⁿ pó-ióng chheng-chhun tát-sêng lāu koh ū oáh-lék ê bòk-phiau, sī múi-chit-ê lâng jîn-seng ê-pòaⁿ-tiûⁿ pit-siu ê kong-khò. In-ūi chòat-tùi bô lâng siūⁿ-beh piàn lāu kap pēⁿ-thiàⁿ tīⁿ-sin, só-pái nā bô siūⁿ beh sìⁿ-miā ê bóe-siaⁿ tī bîn-chhîng-téng chhám-chheh lâi tō--kòe, thé-lêng ê hùn-liân sī pó-chhî kiān-khong, té-khòng lāu-hòa siōng ū lát ê iòh-hng.

# Kiong-hí

恭喜

Tiūⁿ Liōng-ték kàu-siū tit-tiōh  
12 kài Tân-Lâm Bûn-hòa-siúⁿ !

I chhiú nih hit ê siúⁿ tō sī  
Tân Chèng-hiōng ê tiau-khek chok-phín

伊手nih hit ê 賞就是陳正雄 ê 雕刻作品



# A-má, góa thè lí moa ûi-kin

## Sió-ka

**M-chai-iá<sup>n</sup>** ū góa-kú bô tī-leh Tân-oân kòe-nî. Hit-pái tíg-khì Tân-oân chìn-chêng, thia<sup>n</sup> a-pa kóng, a-má chit-má tòa tī-leh gún tau hū-kīn ê an-ióng tiong-sim. A-má í-keng káu-cháp góa hòe, sin-thé tiā<sup>n</sup>-tiā<sup>n</sup> bô-sóng-khoài, put-sam-sî tóh ài châu pē<sup>n</sup>-tī<sup>n</sup>. A-pa kap i ê hia<sup>n</sup>-tī chham-siông liáu-āu, koat-tēng kā a-má sàng-khì an-ióng tiong-sim. Tī-hia, a-má chiah ū-hoat-tō tit-tiöh choân-bīn ê chiàu-kò, ka-siōng choan-giáp ê hō-lí jīn-oân, ū siá<sup>n</sup>-mih chōng-hóng mā ê-tàng chek-sî chhú-lí.

**Jī-káu-mê** hit-kang, a-pa kóng, lán kiâ<sup>n</sup>-lō khì chiap a-má lâi chhù--nih chiàh thoân-î<sup>n</sup>-pñg kám hó? Tong-jîan mā hó, góa án-ne ka ìn.

**Ùi** an-ióng tiong-sim kiâ<sup>n</sup>-lō kàu chhù--nih chha-put-to ài cháp-gō hun-cheng. A-má chē teh lûn-í, a-pa kā i sak leh tâuh-tâuh-á kiâ<sup>n</sup>. Chit-tiâu pún-chiâ<sup>n</sup> ài kiâ<sup>n</sup> cháp-gō hun-cheng ê lō-têng, kiâ<sup>n</sup> chin-kú chin-kú...Tâi-pak ê jī-káu-mê khak-sit chin léng. Kui tiâu lō bô siá<sup>n</sup>-mih lâng, liân hong chhoe--lâi, mā chhin-chhiū<sup>n</sup> chiam teh ui.

**Kiâ<sup>n</sup>** kàu pòa<sup>n</sup>-lō, góa hiông-hiông chù-ì tiöh a-má ê piáu-chêng kán-ná kiat-peng ê khoán, chiah ì-sek tiöh a-má kóng-oe bô hong-piān, kám ê sī sin-thé bô-sóng-khoài, soah bô-hoat-tō piáu-tát?

“**A-má, lí sī-ñ̄-sī chin kōa<sup>n</sup>?**” A-má tìm-thâu, liâh góa kim-kim-khòa<sup>n</sup>.

**Hit-tong-sî** góa tú-hó ū hâ chít-tiâu ûi-kin, tóh kín kā i ùi góa ê ām-kún tháu--lòh-lâi. “A-má, góa thè lí moa ûi-kin.” Èng-kai sī ûi-kin tī góa ê ām-kún í-keng chit-châm-á--ah, iáu-koh sio-hut-hut, khòa<sup>n</sup> a-má ê piáu-chêng kán-ná chin sù-sī. I kā góa tâm chít-ê thâu, bî-bî-á chhiò. Góa àu-náu koh chū-chek, sī án-chóa<sup>n</sup> bô liōng-chá hoat-kiàn chit-ê bûn-tê, hō a-má tī-hia phih-phih-chhoah?

**A-má** ê hī<sup>n</sup>-khang tāng, ták-pái kap i kong-oe ài iōng hoah--ê, ñ̄-chai-iá<sup>n</sup> ê lâng, liâh-chún gún tī-leh oanke. M-nâ chít-pái kóng beh bé chō-thia<sup>n</sup>-khì hō--i, i tóh kóng bô-ài, he siu<sup>n</sup> kùi--ah. “M-thang thó-chè.” “Ài khah khiām--leh.” “Án-ne siu<sup>n</sup>-kòe

bô-chhái.” Sè-hàn sî tiān-tiān thiaⁿ a-má kóng chia ê ōe, sîm-chì kàu i chit ê hòe-sò, iû-oân sî bô kái-piàn.

**Beh** lî-khui Tân-oân ê chêng chit-kang, góa lâi kàu an-ióng tiong-sim, i ê bîn-chhîng piⁿ, iōng hoah--ê kā i kóng: “A-má, góa beh lâi tíg--ah, lí ài pô-tiōng, sin-thé kín hó--khí-lâi ǒ, góa āu-hôe tíg--lâi chiah koh lâi kâ

lí khòaⁿ.” A-má iōng chin lám ê siaⁿ kā góa ìn: “Hó, hó.”

**Peh** kò-goéh liáu-āu, góa koh tíg-lâi khòaⁿ a-má. Chit hôe, i bô-hoat-tō hâm góa kóng-ōe--ah. Tî-leh i ê kò-piát-sek, góa choan-kang kiâⁿ khì i ê sin-khu piⁿ, sè-siaⁿ kā i kóng: “A-má, góa tíg-lâi khòaⁿ--lí ah.”



# 2023 越南文化國際工作坊 —— Bêng-hiong-jîn ián-kiù

明鄉人的在地化研究 ——  
越南、韓國及台灣的比較觀點  
International Workshop  
on Localization of Minh Huong People  
in Vietnam, Korea and Taiwan



Dec. 2~3 @ NCKU, Taiwan 成大台文系



TRUNG TÂM NGHIÊN CỨU VIỆT NAM  
國立成功大學 越南研究中心  
NCKU Center for Vietnamese Studies

主辦



歡迎報名・請詳閱中心網站 >>>



Taiwan-Asia Exchange Foundation

臺灣亞洲交流基金會



Sêng-tâi-Tâi-gí Su-chu-pan  
成大台文系台語師資班  
DEPT OF TAIWANESE LITERATURE, NCKU



社團法人台越文化協會  
Hiệp Hội Văn Hóa Việt Đài  
Association for Taiwanese and Vietnamese Cultural Exchange



Tâi-oân Lô-má-jí Hiáp-hôe  
Taiwanese Romanization Association




Tâi-gí Ki-kim-hôe  
蔣發太孫玉枝台語文教育基金會  
Taiwanese Foundation



國立高雄大學  
越南研究中心

# Hoan-á-iû teng

Bûn / Lahjih Tô / 陳坤明



Hoan-á-iû teng ū-lâng kóng chhàu-iû-giâh, àm-sî tiám-tôh hoan-á-iû teng, tôh-bê àm-bîn-bong.

Ā-koh, hoan-á-iû teng chiâ<sup>n</sup> him-siān tiān-thô-hóe, kng-iā<sup>n</sup>-iā<sup>n</sup>, chhiō chin hñg.

Hoan-á-iû teng ták-àm tôh ka-tî kā teng-sim thóng khah tñg, án-ne tôh--khí-lâi ke chin kng, hoa<sup>n</sup>-hí kâh.

Chú-lâng kám-kak chin siong iû, tôh kā teng-sim ka khah té, kóng: “Bî-bî-á kng khah lōng-bân mā khah séng iû, chiat-séng lêng-goân.”

Goân-lâi bî-bî-á kng khah lōng-bân, koh ē-tàng séng iû chiat-séng lêng-goân, hoan-á-iû teng bô-koh chû-pi, bê koh kâ teng-sim thóng tñg.

## Gū-ì

Chiat-séng lêng-goân sî chit-chióng bí-tek.



# 寄去天堂 ê phoe (2)

陳明仁

**Koh來**當然就beh作ka-tī，tú好美麗雜誌出刊，也sì-kòe去chhōe真正描寫台灣人ê出版品！後--來ê機緣是上帝引chhōa，我ê家庭是普通ê民間信仰，自我作民主運動就無sián tīng去ka-tī ê曆--nih，父母也m̄知，真是上帝施恩，hō我出世tī真好ê pē母家庭，chēng頭到尾，goán老pē、Ai m̄-bat管我beh chhòng sián tāi-chì。Goán老pē日本公學校讀到4年仔，走空sip，就停課學校無開。漢字、日本話lóng小khó-á niâ，goán阿i無受正式教育，m̄-koh 1世人無人嫌有sián thang phín-phóng！大部分無讀hiah chē中華民國教育--ê lóng是án-ni！

你爲寫1張phoe換半世人ê監牢，體會phēng我khah深，深入àu政府打tiáp政治犯ê地獄世界，m̄是我thang比phēng--ê，我聽著政府受難者講起國民黨鷹犬ê殘忍手段，心肝會驚kah tiuh-tiuh疼。

我美麗島事件了後，有情治單位teh尾行(bí-heng)，上帝有beh差用--我，我thang去米國修學，閃pī迫害，也開我學術ê大門，雖講hit時我iāh-bōe認bat上帝！

返台是1987年後，參加黨外雜誌編輯，有機會熟sāi黨外同志，料想bē

到，iáu是hō 國民黨請去坐監！

**Tú好是**蔡有全、許曹德台獨案入監牢，我好運kap in關tī相kāng舍房ê獨居室，對政治犯、美國AI有關懷，獄方hō goán會tàng tī非假日會sái跳房作夥開講2點鐘。曹德兄leh創發台語ê拼寫符號，若無台語話ê台灣文學，獨立建國是空話！我完全同意，曹德兄是揀用接近朝鮮諺文ê字母觀念，有全兄是台南神學院出身ê傳道師，問我koh來有sián按算？我tī編深耕雜誌ê時，有寫台語詩，tī政論有空làng ê篇幅，就thap我ê台語詩，當然是漢字，m̄-koh表達bē出我beh愛ê氣味。有全講，無用白話字，免講mā寫bē出台語ê氣口！我tiōh驚，m̄知白話字，頭pái聽--著。

**蔡有全**傳道用10分鐘講解白話字ê拼音字母！我了解，本底我就有語言學聲韻學ê基礎。當場跪tī塗kha，敬拜上帝，我目chiu開--á，心靈通--á！當日就用漢字lām白話字ê文體，創作台灣ê第一chhut台語舞台劇本「許--家ê運命」。用台灣史作主題，結束tī許蔡案大審判ê法庭舞台，hit時我對台語變調ê規則iáu無眞明白，有ê所在用變調ê調符，後--來chiah修改用原調註台語文。

後回繼續

永康國小學生作品 5年1班

## 上kah意ê科目

### 黃韻文

我上kah意ê科目是數學，只要上數學，我tióh會chiok歡喜。因爲我自細漢阿爸tióh教我數學，所以我就慢慢仔kah意數學ah!我差不多ták工lóng會去算數學，jú算jú有成就感，這就是我kah意數學ê原因；m̄-koh我chiok討厭華語，因爲ài背ê物件真chē，kah社會kāng款，所以阮阿母lóng會kā我講：「你ài tiān-tiān去看冊，華語自然就會進步。」M̄-koh我ták擺聽liáu lóng猶是bē想beh去看冊。我也m̄知án-chóaⁿ ták擺我ê華語月考lóng考了bē-bái，m̄-koh小考lóng考無好，所以我也只好繼續phah-piàⁿ，若無我國中tióh慘--lah。希望我ê華語kah台語lóng ē-tàng jú來jú好。

## 我上kah意ê動物

### 紀媛茹

我上kah意ê動物是兔仔，伊真súi也真古錐。伊有白色ê毛，所以beh hō伊清氣ê厝，ták工lóng替伊洗身軀，真麻煩。Síg--ê是布ang-á，有熊、káu、gû、sai、bé等，只要是動物ê布ang-á，伊lóng kah意。伊lóng穿裙，伊上kah意有花邊ê裙，我ài kā伊thèh去洗，伊竟然tī-hia teh哭。伊lóng食紅菜頭kah白菜頭，其他物件伊lóng m̄食。Nā-sī無食紅菜頭抑是白菜頭，伊hit工lóng m̄ kah我síg。伊ê交通工具是需要人拖ê籃仔。Ták擺我beh去散步lóng ài順sòa thoa伊去，有時伊會走去浴間síg水，真麻煩。伊猶會放屎，我ài替伊清。臭kah beh死，siáng敢處理ah!我決定無ài飼ah。





# 我 ê 家鄉—— Tang 港迎王平安祭典

Chú-kiat

東港古chá號做「Tang津」，因為地理位置方便，有設港口。現代高科技 ê 社會，商港雖然已經 hō 漁業取代，m̄-koh 東港 ê 漁á量猶是全台灣第二，koh 加上 o-àng-chhìng 大出，當 tiòh 時 ê 宣傳 kap 行銷去東港食魚，已經成做東港 ê 招牌 ah。有 chiok chōe 戶外活動，親像小琉球 chhàng-bī、大鵬灣遊潟湖等。逐擺 lóng 吸引大批遊客來熱情 ê 南台灣享受透心涼 ê 海水 kap 輕鬆曝日頭（日光浴）。除去戶外活動，深度文化體驗 mā 是另外一個好選擇。身為東港人，siōng 值得推薦 ê 體驗 oáh-tāng，siōng 代先來紹介三年一擺 ê 「東港迎王平安祭典」。

**迎王平安祭典** 總共 ài 八工七暝。祭典當中會舉行活動；有請水 → 恭請王駕 → 出巡遶境 → 過火安座 → 祀王 → 遷船遶境 → 和瘟押煞 → 宴王 → 送王 → 燒王船，固定三年舉行一擺，tī 台灣 ê 王爺信仰 kap 祭典文化當中，佔 chiok 重要 ê 地位。「迎王平安祭典」 siōng 主要 ê 目的就是藉代天巡狩大千歲 kap 衆神 ê 神威彌平地方上 ê 邪魔、瘟疫、病害等垃圾物 á，保庇信衆會當平安健康。Tī迎王祭典期間，來到東港，親像 chhìng 過時空 jíp-khì 古早時代，會看 tiòh 頭戴清國 ló-léh 帽 á，身穿無全色

水轎班服 ê 轎班，che 是東隆宮迎王祭當中角色 chiok 重要 ê 「七角頭」。祭典 ê 重要特色就是七角頭轎班文化，七角頭 ê hēng-thé 是東港地域 ê 聚落發展。七角頭轎班 tī 迎王祭典期間擔任遶境隊 ê 核心工作，整齊一致 ê 服裝加上世代交替 ê 傳承，就是代表東港迎王文化 ê 核心價值。Mā ē-sái 展現東港人 ê 凝聚力。

**世代相傳**，家家戶戶張燈結綵，東港 ê 大街小巷若 chhiūn teh 辦喜事 -- leh，koh chham 嚴肅尊敬 ê khì 氚，hō 人 tòng-bē-tiāu siūn beh 深探祭典 ê 神秘面紗。除去展現居民對王爺 ê 崇敬以外，koh-khah 較有團結 ê 認同感。Kā tīn 滿滿 ê 愛鄉意識，藉祭典盡量表露出來。當地人重視迎王祭典，比過年過節 koh-khah 重視，無論是離 chhù chiok 遠 ê 遊子，抑是出海 liáh 魚 ê 漁民，lóng 會 tī迎王進前趕轉來故鄉鬥鬧熱。有錢 -- ê 出錢，有力 -- ê 出力，齊心協力 kā迎王 ê 活動 pān hō 好勢。東港迎王是 ùi 日本時代起，kàu taⁿ 已經有百外年 ê 歷史，是台灣重要 ê 文化資產。Mā 是阮身為東港人感覺 chiok 驕傲 ê 家鄉文化。

# 潤餅kauh

朱俊豪

**自細漢**nā到清明拜祖先，阿母透早tiōh開始tī灶跤bō-êng，chhoân一桌chhe<sup>n</sup>-chhau ê菜料，kā所有菜料lóng切做一絲一絲。Koh ài去菜市仔買用tâm mī-chhè tī燒ê thih-pang頂現chhit ê潤餅皮，到中畫ê時，阮一家伙仔tiōh圍tī桌仔邊，家己kauh家己ê潤餅kauh，家己ài食啥物物件tiōh kauh啥物菜料入去。Tiān-tiān菜料kauh kah siu<sup>n</sup> chē包bē起來，koh趕緊加kauh一張潤餅皮á-bô菜料tiōh sòa<sup>n</sup>-iā-iā，真正有夠趣味。Hit-chióng歡喜心情tī我細漢ê時是有夠美好ê記持。

**大漢**了後tī外地讀冊、食頭路，清明tiōh無食潤餅kauh ah。一直kàu前幾冬chiah hiōng-hiōng想tiōh會當hō後生kap查某团食一擺家己做囡仔ê時，清明食ê潤餅kauh。後生kap查某团食了ài kah bē siu-soah，現此時潤餅kauh已經是囡仔siōng ài食ê物仔，清明食潤餅kauh是阮一口灶siōng ài做ê代誌。

**雞kūi-chiah**、sam-chân-á-bah、火燒蝦用滾水燙燙hō熟，高麗菜、芹菜chu-á、豆菜chham chit-sut-á鹽lōh炒hō熟，煎一張卵皮kap一kóa煙腸，

煎hō chhiah-chhiah，kā chia-ê菜料lóng切做一絲一絲，koh chhoân一大phiat-á ê大麵(iah-sī油麵)。外媽hit pēng ê chhin-chiâ<sup>n</sup>-gō-cháp koh會chham豆菜麵，che kan-na有出現tī台南，kap其他ê所在無kāng，iû-kî tī台南溪北地區下營、新營、柳營、白河、後壁、六甲kah大內hit-kho-lê-á特別時行。外公kap外媽ê故鄉是tī善化區ê小新營hām新市區ê Káng-á-kî<sup>n</sup>，正手pēng通大內，往北接下營kah六甲，tiōh lóng有食豆菜麵。現此時tòa tī台南市中西區chhin-chiâ<sup>n</sup> mā會加豆菜麵來kauh潤餅，這種chiâh-sít已經thòan<sup>n</sup>到溪南kap台南市區--ah。

現**chhit** ê潤餅皮，tú khéh到手，koh sio-hùh-hùh，tò轉去了後，ài趕緊kā潤餅皮一片一片áu做葵扇形kā疊疊一疊，按呢beh kauh ê時chiah-bōe黏做伙，醬料準備蒜頭豆油，chham kóa塗豆麩kap糖粉會當siu-ám菜料ê水份，糖粉ài khìng khah chē，因爲台南人食物仔tiōh是ài甜，所以會鋪厚厚一層，食--lùi有塗豆芳koh鹹甜--á鹹甜，hō人tòng-beh-tiâu一喙koh一喙，實在iáu-siū好食，有夠紲喙。



Tí厝kauh潤餅lóng食bē了，chhun ê 菜料tiōh直接炒做一大盤炒麵，chò 後一頓tiōh會當食，ah-bô tiōh是kā 潤餅kauh先kauh hō便koh khng入鼎內用小火ûn-ûn-á煎，煎到潤餅皮chhiah-chhiah koh脆脆芳芳，sió-

khóa有sêng食chìn潤餅kauh，滋味mā是put-chí-á好食。序大人有教ài khîn-khiām，物件ài khioh-sit bē-sái thó-chè。準備潤餅kauh ê過程hō我siàu-liām序大人，順sòa khan-kà序細liáu-kái母通thó-chè物件。

## 原創台語動畫・語詞圖解100+・歡喜學台語



《呆呆囡仔古》台語繪本微動畫系列

Kau-á A-kng in tau



微動畫精彩預告



掃QRCode  
隨看動畫！

狗仔阿光  
in 呀

本冊特色

專業配音員×音樂製作人  
=多元新式ê聽故事體驗



故事內文+附錄圖解  
收錄超過100 ê日常生活台語語詞



滿足讀者各種閱讀情境！



出版・製作團隊  
呆呆伙伴  
DAIDAI FRIENDS



呆呆伙伴 - DaiDai Friends

贊助單位



# 2條線

周碧玲

我 kap 阮頭家 lóng 真愛囡仔，結婚了 tiōh 想 beh khah 繫生一个出來抱。試紙驗尿，若是出現 1 條線是摃龜，2 條線 tiōh 是 tiōh 榮～有身--ah。自 án-ne 我著逐個月興 chhuh-chhuh 去驗尿。等待 ê 心情若親像 teh 等開獎 kāng 款，也緊張也向望。猶毋過，囡仔欲來結緣 mā 母是咱喙講 tiōh 有。

**Tō án-ne**，1個月，2個月，3個月……等 kah kui 面全全是失望 kap 生狂。到第 6 個月，囡仔知影母通 hō 阿母等 siu<sup>n</sup> 久，伊家己就來--ah。看 tiōh 試紙頂頭真真正正 ê 2 條線 hit kang，我，感動 kah 目屎 chháp-chháp 滴，試紙提--leh，gōng-gōng 仔看，微微仔笑。雙手寶惜 phóng tī 胸坎--裡，毋甘提去 tàn -hìn-sak。

這 2kang，我無食啥物歹物仔，腹肚 soah tiuh-tiuh 痒 koh teh 落屎。Omicorn ê 症頭內底除了有 ta 噴，發燒，嚨喉疼，筋肉酸疼猶 koh 有落屎。雖罔我 kan-na 落屎，其他 lóng 好好無代誌，猶是 m̄ 敢 siu<sup>n</sup> 靠勢。昨昏趕緊做快篩，hó-lí-ka-chài kan-na 出現 1 條線 niā-niā，應該是無問題 chiah tiōh。不而過，今仔日早起想想--leh koh 來做 1 pái 較妥當。落尾，hō 我看一下

天險烏 1 pēng：快篩結果竟然是會 hō 人 chiā<sup>n</sup> 費氣 ê 2 條線，也 tiōh 是確定 òe--tiōh--ah。Án-ne，當然是 ài 趕緊騎 o-tó-bái 去防疫診所 hō 醫生看，通報衛生局，然後 tòa 曆--nih 關 7 kang。

平平是 2 條線，一个報喜，一个報愁，一个歡喜迎接，一个足想 beh kā「get out chhia 畚斗。」

隔離 ê 這幾 kang，除了 bē 當出門以外，有手機仔 kap 電腦著會當過日，生活無啥物影響--tiōh。Siōng-kài 歡喜 m̄-nā 是後生 tú 好 tī 曆--nih 「停課無停學」，m̄-nā 替我 chhoân 3頓，-koh kā 大細項代誌款 kah 好勢好勢，毋免人交代，hō 人 chiā<sup>n</sup> 放心。

我人生 ê 2 條線：第一个 hō 我達成願望。第二个 hō 我知影 hō 囡仔機會，伊，tiōh 會大漢。我，知足。感恩～2 條線。



Tâi-bûn Ke-si-mî  
台文雞絲麵





# 性命中ê貴人

高嘉徽

彼種人生當中ê酸甘苦甜，m̄-sī三言兩語ē-tàng講了--ê。Tī春風過身了，我才體會人生中，咱beh ài--ê、beh做--ê，有啥物！

Sī-án-chóa<sup>n</sup>我會講tiōh春風neh?Sī因為伊是我自細漢sék-sāi kàu大漢ê好朋友，因為有伊，hō我ê生活koh jú輕可，伊對我來講m̄-nā是朋友niâ，koh jú成厝內ê人。Ē-tàng解決我心中焦慮ê不安。伊陪伴我10幾年，我ê phah-pià<sup>n</sup>伊lóng看chāi眼內，伊chai-iá<sup>n</sup>我是跤踏實地ê人，bōe用暗步來贏名聲ê人。

因為chūn--n̄春風得tiōh癌，25歲ê伊hō醫生phòa<sup>n</sup>死刑，講伊ê性命活

bōe過hit冬。伊ê離開對我打擊chiok大，自伊破病hit冬，我就kā主祈禱，講kám ē-tàng有神蹟，che lóng是我ê私心kap心內話。雖罔伊去做仙ê代誌hō我chha一點仔行bōe出來，m̄-koh我對家己講，我ài堅強，我koh有chiok長ê路ài行，我bōe-tàng hō春風失望!!

春風ê彼種精神，我會thè伊繼續活落去，kā我siū<sup>n</sup>-beh完成ê夢想做hō好，chiah bōe辜負伊ê用心！再會lah！春風！你永遠是我性命中ê貴人！

2022/01/04



## 台語繪本欣賞與創作

逐禮拜六 · 早時 9:40~10:20

佇成大台文系大樹跤



參加聽故事



掃我FB專頁

參加工作助理

聯絡電話 09111-43668



# 林詠梅女士記持中ê茂生教授 (1)

資料來源／自由之聲 FM91.5  
南方心適代ep.142  
文字整理／林貞佑

主持人／蔣為文  
呂越雄  
來賓／林詠梅

完整放送／  
 YouTube



**林茂生**教授是台灣第一位留學美國 ê 博士，mā 是成大 (彼陣 ê 台南高等工業學校) 第一位台灣人教授。一世人 lóng 為 tiōh 台灣 ê 教育 teh 付出，soah tī 1947 年 hō 國民黨 liāh-- 去，從此被消失--去。今年伊唯一猶 koh 在世 ê 查某团林詠梅女士 mā 已經 87 歲，mā koh 伊對幾十冬前父親林茂生教授 ê 記持猶原清楚。

**林詠梅**女士是厝內唯一 ê 查某团，自細漢 tiōh 真受父親疼痛，tī 林茂生教授 hō 人 liāh-- 去 ê 時陣才 tú kā 伊過了十歲 ê 生日。伊會記得彼日二兄林宗

義聽 tiōh 風聲來勸父親閃避危險，mā koh 父親堅持伊只是單純 teh 教冊、抑無反對政府，認為彼款 liāh 人 ê 代誌一定 kah 家己無關係。結果林詠梅女士 kap 弟弟做伙 hō 二兄 chhōa 去食 in 阿嫂 ê 米粉炒了後無 jōa 久，阿母 tiōh 隨 chhōe 人來通知二兄，講阿爸 hō 人 liāh 去--ah。雖然當時猶 koh 細漢，林詠梅女士 mā 隨感覺 tiōh 一定有出代誌，是大難臨頭 ah。

照林詠梅女士阿母 ê 解說，彼日接近中晝 ùi 一台烏車落來 6 ê 穿中山服、衫內有槍 ê 人，講是林茂生教授真熟

sāi mā tiāⁿ-tiāⁿ leh來往ê台大校長 beh請伊去講話，in母管林教授講伊食飯飽chiah來去，tiōh欲伊隨tòe in上車。林詠梅女士ê母親感覺代誌無單純，隨chhōe校長確認。發現林茂生教授真正hō人騙--去ah，而且àn彼台車ê車牌號碼去查，kan-taⁿ查出是一台hō人徵用ê計程車，無法度知影事實上是啥人leh用。當時國民黨用欺騙、暗殺ê方式，完全無經過正經ê法院程序tiōh kā家己ê阿爸liāh走koh母承認，hō林詠梅女士自細漢tiōh知影in母是一ê正當ê政府。彼陣足多律師、醫生、受高等教育 ê 人lóng hō人liāh--去，林詠梅女士認爲這tiōh是因爲in ê自卑感，in感覺講tī大陸是專制、知影in ê教育程度來遮若beh用原來ê方法會有困難，而且tú tiōh chia有學問ê人會感覺自卑，所以用粗魯ê方式來解決in ê處境，用thâi人ê方法來處理in ê見笑。



來賓林詠梅女士

**林茂生**教授無--去後，林詠梅女士ê母親kap李瑞漢律師ê太太，koh有幾位kāng款先生lóng失蹤ê太太，若聽人講tó-ūi ê田有死人lóng會出去chhōe，tiōh是希望會當將親人ê屍身chhōe--轉來。彼陣林詠梅女士ê大兄tiōh喉結核，伊知影父親無去了後煩惱加深身體mā jú艱苦，當時連藥仔tiōh買無，結果父親三月去了，伊kāng年十月mā過身。Koh有林詠梅女士ê三哥，本來tī日本ê大學讀一半hō人叫去做兵、koh轉來台灣ùi頭重考試才會當繼續讀外文系，讀無到一冬父親無去後伊tiōh隨離開學校去食頭路--ah。

後回繼續

做伙lāi跳現代舞  
Merce Cunningham Technique

徐詩菱  
舞蹈家 帶領人

招生大人  
有舞蹈經驗為佳

一堂課・NT\$ .500

2023.12 ★7 拜四  
貓頭鷹之家2F/台北市雨聲街68號

靚·舞·集 Satsangdance

前往報名  
<https://forms.gle/V3XiEsyajK7ozsNr9>

# 傳承台灣文化 ê 柴頭雕刻藝術家——陳正雄

Tēn Tî-têng／台南報導



成大台文系老師kap學生參訪陳正雄雕刻館

**陳正雄**，1942年tī台南安平出世，是台灣在地出名 ê 柴頭雕刻藝術家。細漢 ê 時陣，厝--nih 13-ê 囂仔內底，陳正雄排名第3。因為厝--nih 不止á sà̄n，所pái 國小畢業了chiū 無法度koh 提供伊繼續讀冊。陳正雄自細漢chiū 真活潑koh hèng 畫圖，14歲tú 滿，chiū hō 倘邊紹介去北港kin-tòe 師傅，學刻神像。自án-ne，陳正雄1-ê 人離開家鄉安平，出外學功夫過生活。

Tī 北港3 tang 4個月過--去，做--ê lóng 是一kóa tâp-tâp-tih-tih ê 雜差á代，mā m̄-bat 刻過神像，m̄-koh chia 雕刻 ê khang-khòe 看chē á，加減mā 是lóng 記入頭殼內底。後--來，kin-tòe 另外1位師傅四界teh 替人裝修廟宇，

師傅真敢放khang-khòe，一kóa 有挑戰性 ê khang-khòe 放hō 伊，mā lóng 處理了真幼路koh 好勢，到chia 來chiah 算是正式來出師。

Khioh 起平常時khang-khòeteh 刻 ê 神像，陳正雄mā 真gâu 四界觀察身軀邊 ê 人事物，kā in 刻做雕像。有1-pái，家己刻teh s̄ng，khng tiâm 倘--nih ê 雕像tú 好去hō 一位來厝內kā 阿母看病 ê 先生看--tiōh，先生chiū ka 鼓勵去參加比賽，想bē 到竟然koh tiōh téng。自án-ne，陳正雄chiah 正式踏入去藝術領域，醉心tī 雕刻柴頭 ê 世界。

**陳正雄**tú 踏入去藝術領域 ê 作品 kap 伊 chit-má ê 作品，有kóa 無kāng，ē-sái 講是代表伊tī 無kāng 階段 ê 人生體

會。Nā是khah早期ê作品，真罕得thang看tiōh人物ê笑容，一方面kap陳正雄ê成長背景有真大ê關係，另外一方面mā反應出陳正雄所觀察tiōh ê台灣人，有肯食苦、樸實、勤儉ê性格，甚至有真出名ê大企業家專工來指定講ài這一味ê作品。

另外，陳正雄khah無teh刻出名ê人物，但是chia作品ê面腔、表情soah lóng會hō人感覺親切koh面熟，chiū親像是咱tòa厝邊頭尾ê chhin-chiān，iáh是路--nih bat相閃身過ê人。每1 sian作品，每1-ê表情lóng是正港台灣人ê面腔。M-nā人物ê表情hō人印象真深，tī-kóa系列ê作品，koh看會出伊對故鄉，iáh是牽手ê情感。親像討海人系列ê作品、一對一對坐做伙，有笑容ê老翁仔某…等，每一件創作lóng看會tiōh伊對伊所生活ê土地kap

人充滿感情。樸實ê情感ē-sái講是伊每1件作品ê靈魂。

陳正雄ê作品m-nā tī台灣國內已經得tiōh chē-chē ê賞kap肯定，mā bat出國比賽tiōh賞koh辦展覽，名聲m-nā透台灣，koh透到國外去，thèng好講是咱台灣jió-toh ê雕刻代表！



黃基興 劍獅經典展 陳建智  
Huang Jixing & Chen Jianzhi  
Classic sword lion wood carving exhibition

2023.10.28  
↓  
2024.01.21

鶯 安平美術館  
台南市安平區安北路188-1號  
週六・週日 13:30~17:30  
0925 738 977

The poster features two circular images. The left circle shows a highly detailed wooden sculpture of a lion's head, with intricate textures and colors. The right circle shows a circular arrangement of many different types of swords, all pointing towards a central decorative element.

# 新冊發表會


(回顧)

2023  
New Book Launch

詳細報導



## 台語小說《放毒》・台文筆會年刊 NO.10



會後做伙hip相



台文筆會祕書長 蔣為文教授 正手pêng

台南文化獎 ê tiöh 賞人・成大傑出校友

張良澤教授 中央

台文作家 杜信龍先進 tò手pêng

主辦 |

台文筆會  
Tâi-bûn Pit-hōe  
Taiwanese Pen



Sêng-tâi Tâi-gí Su-chu-pân  
成大台文系台語師資班  
DEPT OF TAIWANESE LITERATURE, NCKU



# 台語文獎學金得獎名單

TÀI-GÍ-BÙN CHIÓNG-HÁK-KIM TIT-CHIÓNG MIÂ-TOA"



林茂生教授 **台語教學優良獎**  
巫義淵



王育霖 **詩人檢察官獎**  
許珮旻 陳語涵  
吳宜珊 林俞姈



蔣發太先生 **台語文傳承獎**  
林宜萱 許珮旻 林俊義  
陳語涵 佟苑如 侯亮廷  
全林楷倫 林冠廷 吳宜珊  
曾力文 翁歆媧



鄭兒玉牧師 **白話字貢獻獎**  
鄭智程



詹文聲教授 **外籍生台語文獎學金**  
王浚耀



蔣發太先生 **台語師培菁英獎**  
王浚耀 許珮旻 曾力文  
林鈺翔 黃郁珊 李偲瑋  
張智峯 林玟錚



王育德教授 **台語文研究獎**  
翁歆媧



<<< 頒獎詳細報導

主辦單位 國立成功大學 台灣語文測驗中心  
NCKU Center for Taiwanese Languages Testing



Sêng-tâi Tài-gí Su-chu-pán  
盛大台文系台語師資班  
DEPT OF TAIWANESE LITERATURE, NCKU



Tâi-gí Ki-kim-hōe  
蔣發太孫玉枝台語文教育基金會  
Taiwanese Foundation

Tâi-oân-jī  
台灣字 · 陳麗

發行  
單位



Tâi-oân Lô-má-jī Hiáp-hōe  
Taiwanese Romanization Association  
台灣羅馬字協會  
<https://tlh.org.tw>



[Https://pen.de-han.org/taioanji](https://pen.de-han.org/taioanji)



Open access 網路電子版 &  
文章投稿請掃 QR code



台文筆會  
Tâi-bün Pit-hōe  
Taiwanese Pen



<https://pen.de-han.org>



獎助  
單位



Tâi-gí Ki-kim-hōe  
蔣發太孫玉枝台語文教育基金會  
Taiwanese Foundation  
<https://hoatki.de-han.org>



Nâ有任何問題歡迎來 phoe:  
[taioanjitauko@gmail.com](mailto:taioanjitauko@gmail.com)  
Tel: 06-2096384